

vnd ingeben mit crafft diesis briefis vnd wollin heissin vnd gebiten von gewisser wissintschafft vnsern voiten vnd amptluten daselbins zcu Missin kegenwertigen vnd zcukumpftigen, das sie vnd ör iczlicher sich in sulche zcweyteil des gerichtis nicht legen nach werren sullen in keynwiß, sundern die obgnanten burgermeister rethe vnd gemeynheit der vorgnanten czweyteil mit allen sinen werden gewonheiten nuzen vnd zugehorungen geruglich ynne habin vnd gebruchen lassin. Geschege abir, das sich vnser voite, amptlute ader ymand anders in die vorgnanten czweyteil des gerichtis, als wit als wichbilde zcu Missin wendet vnd vßgesaczt ist, als vorgeschreiben stehit ader yn öre vorbenante zugehorunge legen setzen sprechen ader werren welden, von wes wegin ader in welchir wiß sy das teten, so wollin vnd sollin wir, vnser erben vnd erbnemen die egnanten vnser burger zcu Missin bie den obgeschreiben czwenteilen des gerichtis mit allen yren werden gewonheiten nuzen vnd zugehorungen behalden, schutetzen vestiglich vnd vortedingen vnd ernstlich darczu thun, also das sie bie den vorgnanten czwenteilen des gerichtis zcu Missin in aller masse als obingeschrebin stehit bliben, die ynne habin vnd der gebruchen ane allerleye hindernisse vnd geuerde. Were ouch, das wir, vnser erben ader erbnemen die vorgnanten czweyteil des gerichtis von den vilgnanten burgermeistern, rethen vnd der gemeyne daselbins weder keuffen welden, so sollin vnd wollin wir ön den widerkouff eyn virtil iars vor vorkundigen vnd sagen, vnd in dem nehsten virtil iares nach der vorkundigung sechshundert Rynische gulden gutis goldes vnd volkomendis gewichtis vor die gnanten czweyteil des gerichtis in der gnanten vnser stad Missin vnuorsprochlich genczlich vnd wol bezalen ader bezalen lassin ane allen intrag vnd geuerde. Die wile wir abir ader vnser erbin ader erbnemen die mergnanten czweyteil des gerichtis nicht wedergekoufft nach den burgern zcu Missin vorgnanten die obgeschrebin sechshundert gute Rynische gulden dauor bezalt habin in allir moge als obgeschrebin stehit, so wollin vnd sollin wir, vnser erbin vnd erbnemen keynerley vornemen, das den gnanten vnsern burgern zcu Missin an den czwenteilen des gerichtis ader synen zugehorungen ader an den sechshundert gutin Rynischin gulden hindernisse ader intrag brengen mochte. Wenne wir aber, vnser erben ader erbnemen das von yn wider gekoufft vnd yn die mergnanten sechshundert gute Rynische gulden dauor genczlich vnd wol bezalt haben als abingeschrebin stehit, so sullen sie vns vnsern erben vnd erbnemen dieselben czweyteil des gerichtis wider abetreten vnd vns die wider antworten in allirmasse, als sie die von vns empfangen vnd ingenomen habin ane geuerde. Des zcu orkunde vnd warem bekentnisse habin wir vor vns vnd vor alle vnser erben vnd erbnemen vnser insigel wissintlichin an diesen briff lassin hengen, der gegeben ist zcu Friberg nach Cristi geborte virczhundert iar vnd darnach in dem drie vnd czwenzigisten iare am dornstage nach Egidii.

Nach dem Orig. im Rathsarchiv zu Meissen mit dem Siegel des Kurfürsten an einem Pergamentstreifen.